



REPUBLIKA E SHQIPËRISË
KËSHILLI I EMËRIMEVE NË DREJTËSI

VENDIM

Nr.23, datë 21.08.2020

PËR NDALIMIN E KANDIDIMIT TË ZOTIT SHAQIR HASANAJ NË VENDIN VAKANT PËR GJYQATAR NË GJYKATËN KUSHTETUESE, SHPALLUR NGA PRESIDENTI I REPUBLIKËS MË DATË 07.02.2018 DHE RISHPALLUR MË DATË 27.09.2019

Këshilli i Emërimeve në Drejtësi, i përbërë nga :

Vitore Tusha	- Zëvendëskryetare
Fiona Papajorgji	- Anëtare
Arta Marku	- Anëtare/relatore
Miranda Andoni	- Anëtare
Saida Dollani	- Anëtare
Ludovik Dodaj	- Anëtar
Fatjona Memçaj	- Anëtare
Arjan Qafa	- Anëtar

Asistuar nga sekretare Redjona Myrtaj,

Me praninë e Avokatit i Popullit, përfaqësuar me autorizim nga **z. Enio Haxhimihali**, në cilësinë vëzhguesit të përhershëm të mbledhjeve dhe veprimtarisë së Këshillit të Emërimeve në Drejtësi,

Me praninë e përfaqësuesve të autorizuar të subjekteve të ftuara sipas ligjit për pjesëmarrje, në cilësinë e vëzhguesve, në mbledhjen e Këshillit:

- **z. Bledar Dervishaj**, përfaqësues i autorizuar i Presidentit të Republikës,

- në mungesë të përfaqësuesve të tjerë të subjekteve të ftuara sipas ligjit për pjesëmarrje,

në mbledhjen e datës **21.08.2020**, mori në shqyrtim çështjen që i përket:

**KANDIDATI PËR GJYQATAR
NË GJYKATËN KUSHTETUESE:**

z. SHAQIR HASANAJ

OBJEKTI:

Urdhërimi i ndalimit të kandidimit të **z. Shaqir Hasanaj**, në vendin vakant për gjyqtar në Gjykatën Kushtetuese, të shpallur nga Presidenti i Republikës më datë **07.02.2018** dhe rishpallur më datë **21.09.2019**.

KËSHILLI I EMËRIMEVE NË DREJTËSI

Pasi dëgjoji relatimin e anëtares së Këshillit, **Arta Marku**, mendimin e paraqitur nga Avokati i Popullit, përfaqësuar nga z. Enio Haxhimihali në cilësinë e vëzhguesit të përhershëm, në mbledhjen dhe veprimtarinë e Këshillit të Emërimeve në Drejtësi, lidhur me mënyrën e procedimit të ndjekur për verifikimin e kandidatit,

dhe si bisedoi çështjen në tërësi,

VËREN:

I. Rrethanat e çështjes

1. Në zbatim të nenit 125 të Kushtetutës dhe të pikës 1 të nenit 7/b të Ligjit nr. 8577/2000 “Për organizimin dhe funksionimin e Gjykatës Kushtetuese në Republikën e Shqipërisë”, i ndryshuar (në vijim ligji nr. 8577/2000), Presidenti i Republikës, në datën 07.02.2018, ka shpallur hapjen e procedurës së aplikimeve për plotësimin e vendit vakant, vakancë e parakohshme, të krijuar në Gjykatën Kushtetuese pas mbarimit të mandatit të ish-gjyqtarit Besnik Imeraj.

2. Këshilli i Emërimeve në Drejtësi, në përfundim të procedurës së verifikimit dhe të vlerësimit, për vakancën e shpallur nga Presidenti i Republikës, në datën 07.02.2018, me vendimin nr. 137, datë 21.09.2019, vendosi:

- Pezullimin e procedurës së verifikimit të kandidaturave dhe njoftimin e subjektit që e ka vënë në lëvizje, Presidentin e Republikës, për të vlerësuar rishpalljen e thirrjes për paraqitjen e kandidaturave për plotësimin e vendit vakant në Gjykatën Kushtetuese, vakancë e parakohshme, të shpallur me dekretin nr.10723 datë 07.02.2018 nga Presidenti i Republikës.

3. Në zbatim të vendimit nr. 137, datë 21.09.2019 të Këshillit të Emërimeve në Drejtësi dhe të nenit 125 të Kushtetutës dhe të pikës 1 të nenit 7/b të Ligjit nr. 8577/2000 “Për organizimin dhe funksionimin e Gjykatës Kushtetuese në Republikën e Shqipërisë”, Presidenti i Republikës, në datën 27.09.2019, ka rishpallur hapjen e procedurës së aplikimeve për plotësimin e vendit vakant, vakancë e parakohshme, të krijuar në Gjykatën Kushtetuese pas mbarimit të mandatit të ish-gjyqtarit Besnik Imeraj.

4. Në përfundim të procedurës së aplikimeve për shprehjen e interesit për kandidim, Presidenti i Republikës i ka dërguar Këshillit të Emërimeve në Drejtësi aplikimet e kandidatëve të shoqëruara me dokumentet e paraqitura prej tyre për përmbushjen e kushteve dhe kriterëve ligjore të përcaktuara në nenin 7/a të ligjit nr. 8577/2000.

5. Në vijim, Këshilli i Emërimeve në Drejtësi, me vendimin nr.138 datë 22.10.2019, vendosi:

Revokimin e vendimit nr. 137 datë 21.09.2019 “Për pezullimin e procedurës së verifikimit të kandidaturave dhe njoftimin e subjektit që e ka vënë në lëvizje, Presidentin e Republikës së Shqipërisë, për të vlerësuar rishpalljen e thirrjes për paraqitjen e kandidaturave për plotësimin e vendit vakant në Gjykatën Kushtetuese, vakancë e parakohshme, të shpallur me Dekretin nr. 10723 datë 07.02.2018 nga Presidenti i Republikës”.

Vijimin e procedurave të verifikimit dhe të vlerësimit, të kandidaturave për plotësimin e vendit vakant në Gjykatën Kushtetuese, vakancë e parakohshme, të rishpallur me Dekretin nr.11291 datë 27.09.2019 nga Presidenti i Republikës së Shqipërisë.

6. Sipas rezultatit të shortit manual të realizuar në datën 05.04.2019, nga ana e Këshillit të Emërimeve në Drejtësi në zbatim të nenit 228 të Ligjit nr. 115/2016 “Për organet e qeverisjes së sistemit të drejtësisë” (në vijim ligji nr. 115/2016) dhe të pikave 5, 27 deri 37 dhe 41 të Vendimit të Këshillit të Emërimeve në Drejtësi nr. 2 datë 15.02.2019 “Për procedurën e shortit të caktimit të relatorëve për pozicionet vakante në çdo institucion”, si edhe të pikës 4 të Vendimit të Këshillit të Emërimeve në Drejtësi nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, relator për ndjekjen e procedurave të verifikimit, vlerësimit, pikëzimit dhe renditjes së kandidaturave, është caktuar anëtar i Këshillit, z. Eriol Roshi. Për shkak të përfundimit të mandatit të Këshillit të Emërimeve në Drejtësi (i përkohshëm) 2019, zhvillimi i procedurave të verifikimit për këtë pozicion vakant i kaloi Këshillit të Emërimeve në Drejtësi 2020, i cili në datë 15.01.2020 zhvilloi shortin manual dhe relator për ndjekjen e procedurave të verifikimit, vlerësimit, pikëzimit dhe renditjes së kandidaturave, është caktuar anëtarja e Këshillit Arta Marku. Sipas parashikimit të pikës 5/2, shkronja b), të vendimit nr. 4, datë 11.3.2019, të ndryshuar, të Këshillit të Emërimeve në Drejtësi, relatorja kontrollon saktësinë dhe plotësinë e veprimeve të kryera dhe konfirmoi veprimet e kryera nga relatorët e mëparshëm.

7. Z. Shaqir Hasanaj, si njëri ndër kandidatët që ka shprehur interesin për vendin vakant të sipërcituar në Gjykatën Kushtetuese, në zbatim të pikës 22 të Vendimit të Këshillit të Emërimeve në Drejtësi nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, është njoftuar me shkrim për t’u paraqitur pranë Këshillit për të vijuar me përmbushjen e procedurave të verifikimit të kandidaturës së tij. Njoftimi me shkrim, i kryer në rrugë elektronike në adresën e deklaruar nga vetë kandidati Shaqir Hasanaj, gjendet i administruar në dosjen e kandidimit.

8. Në datën 23.10.2019, kandidati Shaqir Hasanaj është paraqitur pranë Këshillit të Emërimeve në Drejtësi dhe është pajisur me formularët e deklarimit dhe autorizimet që duhet të plotësohen për qëllimet e vijimit të procedurës së verifikimit të kandidaturës së tij. Kryerja e kësaj procedure vërtetohet nga nënshkrimi prej vetë kandidatit në deklaratën përkatëse, e cila gjendet e administruar në dosjen e kandidimit.

9. Në datën 25.10.2019, kandidati Shaqir Hasanaj ka depozituar në sekretarinë e Këshillit të Emërimeve në Drejtësi formularët e deklarimit dhe autorizimet përkatëse për qëllimet e vijimit të procedurës së verifikimit të kandidaturës së tij, të cilat gjenden të administruara në dosjen e kandidimit.

10. Këshilli i Emërimeve në Drejtësi, duke qenë se për këtë kandidat ka vijuar procedura e verifikimit paraprakisht, pasi ka aplikuar edhe për pozicionin vakant të shpallur nga Kuvendi, nuk ka dërguar shkresa dhe nuk ka kërkuar informacione shtesë. Verifikimi i këtij kandidati do të bëhet me dokumentacionin e kërkuar më parë për pozicionin vakant të shpallur nga Kuvendi, pasi nuk kanë hapësirë kohore ndërmjet tyre dhe nuk do të mbingarkohet procesi i verifikimit me shkresa të dublikuara për të njëjtin kandidat. Përgjashtimisht nga ky rregull, është korrespondenca me ILDKPKI, për të cilën janë dërguar shkresat sipas parashikimeve ligjore.

11. Për verifikimin e kushteve dhe kriterëve ligjore të kandidimit, lidhur me verifikimin dhe kontrollin e pasurisë, në zbatim të shkronjës “dh” të nenit 7/a të ligjit nr. 8577/2000, të nenit 235 të ligjit nr. 115/2016, si edhe në zbatim të pikës 60 të Vendimit të Këshillit të Emërimeve në Drejtësi nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, me shkresën nr. 703 prot., datë 30.10.2019, Këshilli i ka dërguar ILDKPKI-së listën e kandidatëve dhe personave të lidhur me ta që i nënshtrohen procedurës së verifikimit të kushteve dhe kriterëve të tjera ligjore të kandidimit sipas ligjit nr. 8577/2000 dhe ligjit nr. 115/2016.

12. Bashkëlidhur kësaj shkrese drejtuar ILDKPKI-së, ndërmjet të tjerave, është vendosur edhe deklarata e nënshkruar nga kandidati Shaqir Hasanaj, ku tregohet se është pajisur me formularët e deklarimit dhe autorizimet që duhet të plotësohen për qëllimet e procedurës së verifikimit të kandidaturës së tij, si edhe data e nënshkrimit, nga e cila fillojnë të llogariten afatet e përcaktuara nga ligji për përmbushjen e detyrimeve ligjore të kandidatit për procedurën e verifikimit të kandidaturës së tij.

13. ILDKPKI-ja, në zbatim të nenit 235 të ligjit nr. 115/2016, të ligjit nr. 9049, datë 10.04.2003 “Për deklarimin dhe kontrollin e pasurive, të detyrimeve financiare të të zgjedhurve dhe të disa nëpunësve publikë” (në vijim ligji nr. 9049/2003) dhe ligjit nr. 9367, datë 07.04.2005 “Për parandalimin e konfliktit të interesave në ushtrimin e funksioneve publike” (në vijim ligji nr. 9367/2005), me shkresën nr. 113/26 prot., datë 03.12.2019, ka dërguar pranë Këshillit të Emërimeve në Drejtësi rezultatet e kontrollit të ushtruar për kandidatin Shaqir Hasanaj dhe personat e lidhur me të.

14. Gjithashtu, në funksion të ushtrimit të kompetencave të tij për verifikimin e plotësimit të kushteve dhe kriterëve ligjore të kandidimit, për sa i përket kontrollit të pasurisë, në zbatim të pikës 4 të nenit 229 dhe nenit 235 të ligjit nr. 115/2016, të shkronjës “e” të pikës 20, 24, shkronjës “b” të pikës 60 e vijues të Vendimit të Këshillit të Emërimeve në Drejtësi nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, edhe ky Këshill ka kryer veprimet verifikuese të kërkimit nga subjekte publike dhe private, të të dhënave mbi pasuritë, interesat private dhe detyrimet financiare që ekzistojnë në emër dhe për llogari të kandidatit Shaqir Hasanaj dhe personave të lidhur me të.

15. Për realizimin e veprimeve verifikuese të lidhura me kontrollin e pasurisë së kandidatit Shaqir Hasanaj, Këshilli i Emërimeve në Drejtësi, në datën 09.10.2019, i është drejtuar me kërkesa për informacion dhe ka marrë përgjigjet përkatëse me të dhënat e kërkuara nga secili prej institucioneve publike dhe subjekteve private (të cilat janë administruar në dosjen e kandidimit), si vijon:

- a) Institucioneve bankare: (1) Banka Alpha Albania, (2) Banka Amerikane e Investimeve, (3) Banka Credins, (4) Banka e Bashkuar e Shqipërisë, (5) Banka e Kreditit e Shqipërisë, (6) Banka e Parë e Investimeve, (7) Banka Intesa Sanpaolo, (8) Banka Kombëtare Tregtare, (9) Banka Ndërkombëtare Tregtare, (10) Banka Procredit, (11) Banka Raiffeisen, (12) Banka Societe Generale, (13) Banka Tirana dhe (14) Banka Union.
- b) Institucione financiare të licencuara nga Banka e Shqipërisë : (1) Ak-Invest, (2) Albania Leasing, (3) Capital Invest, (4) Easypay sh.p.k, (5) Final sha, (6) Fondi Besa, (7) Iutecredit Albania, (8) Landeslease, (9) M – Pay sh.p.k, (10) NOA sha, (11) Porsche Leasing, (12) Posta Shqiptare, (13) Raiffeisen Leasing, (14) Shoqëria e Parë

- Financiare e Zhvillimit – FAF, (15) Tirana Factoring & Lease, (16) Tranzit sha, (17) Union Financiar Tiranë.
- c) Subjekte financiare të licencuar nga AMF : (1) Fondi i Pensionit Vullnetar Credins Pension, (2) Fondi i Investimit Credins Premium, (3) Fondi i Investimit Raiffeisen Invest Euro, (4) Fondi i Investimit Raiffeisen Prestigj, (5) Fondi i Investimit Raiffeisen Vision, (6) Fondi i Investimit ËVP Top Invest, (7) Fondi i Pensionit Vullnetar Raiffeisen, (8) Fondi i Pensionit Vullnetar Sigal.
- ç) Institucione të tjera publike si : (1) Agjencia Shtetërore e Kadastrës, (2) DPSHTRR, (3) D.P.Tatimeve, (4) M.Drejtesisë, (5) OSHEE, (6) QKB, (7) UKT.

16. Në përgjigje të kërkesave për informacion të Këshillit të Emërimeve në Drejtësi, të gjitha institucionet publike dhe subjektet private të treguara në pikën 16 më sipër, me përjashtim të Banka Alpha Albania, kanë dërguar pranë Këshillit përgjigjet përkatëse ku përmbahen të gjitha të dhënat e kërkuara mbi pasuritë e kandidatëve, nëse kanë pasur të tilla për secilin prej tyre, përfshirë edhe kandidatin Shaqir Hasanaj.

17. Për verifikimin e kushteve dhe kriterëve ligjore të kandidimit, lidhur me verifikimin dhe kontrollin e integritetit, në zbatim të shkronjës “ç” të nenit 7/a të ligjit nr. 8577/2000, të nenit 236 të ligjit nr. 115/2016, si edhe në zbatim të pikës 82 të Vendimit të Këshillit të Emërimeve në Drejtësi nr. 4, datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, me shkresën nr. 603 prot., datë 09.10.2019, Këshilli ka dërguar në Prokurorinë e Përgjithshme për kompetencë formularin e vetëdeklarimit të plotësuar nga kandidati Shaqir Hasanaj sipas ligjit nr. 138/2015 “Për garantimin e integritetit të personave që zgjidhen, emërohen ose ushtrojnë funksione publike” (në vijim ligji nr. 138/2015).

18. Prokuroria e Përgjithshme, me shkresën nr. 2690/114 prot., datë 21.11.2019, ka dërguar pranë Këshillit të Emërimeve në Drejtësi rezultatet e kontrollit të ushtruar për kandidatin Shaqir Hasanaj.

19. Për verifikimin e kushteve dhe kriterëve ligjore të kandidimit, lidhur me verifikimin dhe kontrollin e integritetit të kandidatis Shaqir Hasanaj, në zbatim të shkronjës “ç” të nenit 7/a të ligjit nr. 8577/2000, të nenit 236 të ligjit nr. 115/2016, si edhe në zbatim të pikës 84 të Vendimit të Këshillit të Emërimeve në Drejtësi nr. 4, datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, Këshilli i është drejtuar me kërkesë për ndihmë administrative për përpunimin e informacionit të klasifikuar për qëllimet e verifikimit të integritetit të kandidatëve Drejtorisë së Sigurisë së Informacionit të Klasifikuar (shkresa nr.602 prot., datë 09.10.2019) dhe me kërkesë për informacion Shërbimit për Çështjet e Brendshme dhe Ankesat pranë Ministrisë së Brendshme (shkresa nr.604 prot., datë 09.10.2019).

20. Drejtoria e Sigurisë së Informacionit të Klasifikuar dhe Shërbimi për Çështjet e Brendshme dhe Ankesat pranë Ministrisë së Brendshme kanë dërguar përgjigjet e tyre, përkatësisht me shkresat nr.3777 prot., datë 21.11.2019, si dhe nr.2155 prot., datë 22.10.2019, e nr.2050/2 prot., datë 28.10.2019.

21. Gjithashtu, lidhur me verifikimin dhe kontrollin e integritetit, në zbatim të nenit 229 dhe 236 të ligjit nr. 115/2016, të dispozitave të ligjit nr. 45/2015 “Për të drejtën e informimit për dokumentet e Ish-Sigurimit të Shtetit të Republikës Popullore Socialiste të Shqipërisë” (në vijim ligji nr. 45/2015), si edhe në zbatim të pikës 85 të Vendimit të Këshillit të Emërimeve në Drejtësi nr. 4, datë 11.03.2019 “*Për procedurën e verifikimit të kandidatëve për pozicionet*

vakante në Gjykatën Kushtetuese dhe të Inspektorit të Lartë të Drejtësisë”, me shkresën nr. 601 prot., datë 09.10.2019, Këshilli ka dërguar formularin e aplikimit përkatës të plotësuar sipas ligjit nga kandidati Shaqir Hasanaj për kompetencë dhe shqyrtim Autoritetit për Informimin mbi Dokumentet e Ish-Sigurimit të Shtetit.

22. Autoriteti për Informimin mbi Dokumentet e Ish-Sigurimit të Shtetit, me shkresën nr. 1386/4 prot., datë 25.10.2019, ka dërguar Vendimin nr. 671, datë 25.10.2019 pranë Këshillit të Emërimeve në Drejtësi me rezultatet e kontrollit të ushtruar për kandidatin Shaqir Hasanaj.

23. Për verifikimin e kushteve dhe kritereve ligjore të kandidimit, në zbatim të shkronjave “b”, “c” dhe “d” të pikës 1, pikës 2 dhe 3 të nenit 7/a të ligjit nr. 8577/2000, të nenit 237 dhe 240 të ligjit nr. 115/2016, si edhe në zbatim të pikave 91 e 93 të Vendimit të Këshillit të Emërimeve në Drejtësi nr. 4, datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, Këshilli ka shqyrtuar dokumentacionin përkatës të depozituar nga vetë kandidati Shaqir Hasanaj në momentin e kandidimit pranë organit të emërtesës që ka shpallur vendin vakant.

24. Lidhur me kushtin e kandidimit të parashikuar nga pika 5 e nenit 125 të Kushtetutës dhe shkronja “c” e pikës 1 të nenit 7/a të ligjit nr. 8577/2000, pra që kandidati *të mos ketë mbajtur pozicione drejtuese në parti politike gjatë 10 viteve të fundit nga data e kandidimit*, Këshilli në datën 16.10.2019 i është drejtuar me kërkesë për informacion partive politike, duke i bashkëlidhur listat e të gjithë kandidatëve për gjyqtar në Gjykatën Kushtetuese. Në përgjigje të këtyre kërkesave, partitë politike kanë dërguar informacione lidhur me ekzistencën ose jo të të dhënave që do të vërtetonin angazhimin në ndonjë pozicion drejtues në parti politike të secilit prej kandidatëve, përfshirë edhe kandidatin Shaqir Hasanaj.

25. Gjithashtu për këtë rast kandidimi, në verifikim të kushteve të përcaktuara nga pika 1 e neni 237 i ligjit nr. 115/2016 në kombinim me shkronjat c) dhe d) të pikës 1 si dhe shkronjën a) të pikës 2 të nenit 7/a të ligjit nr. 8577/2000, Këshilli vlerësoi t’i drejtohet me kërkesa për informacion disa institucioneve publike dhe subjekteve private, pranë të cilave kandidati Shaqir Hasanaj ka ushtruar funksione publike ose veprimtari private profesionale apo ku gjenden të dhëna lidhur me ushtrimin e detyrave dhe veprimtarinë profesionale të kandidatit si: Universitetit të Tiranës, Fakultetit të Drejtësisë (*shkresa nr. 690 prot., datë 18.10.2019*), Radio Televizionit Shqiptar (*shkresa nr. 688 prot., datë 18.10.2019*), Presidentit të Republikës (*shkresa nr. 687 prot., datë 18.10.2019*), Këshillit të Lartë Gjyqësor (*shkresa nr. 686 prot., datë 18.10.2019 dhe shkresa nr. 715 prot., datë 08.11.2019*), Dhomës Kombëtare të Avokatisë (*shkresa nr. 685 prot., datë 18.10.2019*), Drejtorisë së Përgjithshme të Tatimeve (*shkresa nr. 691 prot., datë 18.10.2019*), Institutit të Sigurimeve Shoqërore (*shkresa nr. 689 prot., datë 18.10.2019*).

26. Lidhur me të dhënat e kërkuara, Këshilli ka marrë përgjigje me shkrim nga Universiteti i Tiranës, Fakulteti i Drejtësisë (*s’ka përgjigje*), Radio Televizioni Shqiptar (*shkresa nr. 2994/1 prot.*), Presidenti i Republikës (*shkresa nr. 3795/1 prot., datë 05.11.2019*), Këshilli i Lartë Gjyqësor (*shkresa nr. 5180 prot., datë 25.10.2019 dhe shkresa nr. 5591/1 prot., datë 13.11.2019*), Dhoma e Avokatëve të Shqipërisë (*shkresa nr. 462 prot., datë 24.10.2019*), Drejtoria e Përgjithshme e Tatimeve (*shkresa nr. 51839/1 prot., datë 31.10.2019*), Instituti i Sigurimeve Shoqërore (*shkresa nr. 7230 prot., datë 23.10.2019*).

27. Këshilli i Emërimeve në Drejtësi në datën 12.02.2020, nëpërmjet një e-maili, i ka kërkuar shpjegime kandidatit, z. Shaqir Hasanaj, lidhur me faktin e masave disiplinore të evidentuara në shkresat e sjella nga Këshilli i Lartë Gjyqësor dhe lidhur me natyrën juridike të pozicionit

të ushtruar pranë Presidentit të Republikës. Kandidati, me shkresën nr. 51 prot., datë 17.02.2020, ka depozituar pranë Këshillit të Emërimeve në Drejtësi sqarimet përkatëse dhe një kopje të Vendimit datë 13.10.1999 të Gjykatës Kushtetuese, një kopje të Vendimit nr. 3, datë 20.02.2006 të Gjykatës Kushtetuese.

28. Në mbledhjen e datës 17.07.2020, sipas rendit të ditës, Këshilli i Emërimeve në Drejtësi ka votuar në lidhje me gjetjet gjatë procedurës së verifikimit të kushteve ligjore për kandidatin Shaqir Hasanaj, duke vendosur në përfundim me Vendimin nr. 16, datë 17.07.2020 *“Ndalimin e kandidimit të kandidatit Shaqir Hasanaj, në vendin vakant për gjyqtar në Gjykatën Kushtetuese, të rishpallur nga Presidenti i Republikës më datë 27.09.2019...”*.

29. Vendimi nr. 16, datë 17.07.2020 i Këshillit të Emërimeve në Drejtësi është ankimuar nga kandidati Shaqir Hasanaj, në Gjykatën Administrative të Apelit, me kërkimet (objekti): *“Pavlefshmërinë e vendimit nr. 15, datë 17.07.2020, të Këshillit të Emërimeve në Drejtësi “Për ndalimin e kandidimit të z.Shaqir Hasanaj, në vendin vakant për gjyqtar në Gjykatën Kushtetuese, shpallur nga Kuvendi i Republikës në datën 28.08.2018, dhe rishpallur në datë 21.08.2019”*.

Pavlefshmërinë e vendimit nr. 16, datë 17.07.2020, të Këshillit të Emërimeve në Drejtësi “Për ndalimin e kandidimit të z.Shaqir Hasanaj në vendin vakant për gjyqtar në Gjykatën Kushtetuese, shpallur nga Presidenti i Republikës në datën 07.02.2018 dhe rishpallur në datë 27.09.2019”.

Konstatimin e shkeljes në nenit 6 dhe 8 të KEDNJ si rezultat i ndalimit të kandidimit për anëtar të GJK.

Detyrimin e palës së paditur, KED të përfundojë procedurën për z.Shaqir Hasanaj për vakancën e shpallur nga Kuvendi i Republikës në datën 28.08.2018 dhe rishpallur në datë 21.08.2019.

Detyrimin e palës së paditur, KED të përfundojë procedurën për z.Shaqir Hasanaj për vakancën e shpallur nga Presidenti i Republikës në datën 07.02.2018 dhe rishpallur në datë 27.09.2019’.

30. **Gjykata Administrative e Apelit, me vendimin nr. 67 datë 10.08.2020**, në pjesën arsyetuese të vendimit ndër të tjera ka evidentuar se *“...arsyetimi i vendimit dhe shkaqet e ndalimit të tij nuk janë në harmoni dhe përputhje me vendimmarrjen e gjithsecilit anëtar të KED-së pasi kuorumi i duhur për vendimmarrjen e ndalimit të kandidimit të tij është me shumicë votash 6 pro dy kundër vetëm për kriterin që kandidati të mos jetë larguar nga detyra për shkaqe disiplinore dhe të mos ketë masë disiplinore në fuqi të parashikuar nga shkronja “d” e pikës 1 të nenit 7/a të ligjit nr. 8577/2000. Kriter i cili është arsyetuar nga KED në vendimet objekt ankimi nga pika 66 deri në pikën 75. Ndërsa në lidhje me kriterin ndalues të arsyetuar në vendim si një tjetër shkak për ndalimin e kandidimit të kandidatit Shaqir Hasanaj për vendin vakant për gjyqtar në Gjykatën Kushtetuese për shkak të ushtrimit të detyrës si Këshilltar Juridik pranë Presidentit të Republikës të parashikuar nga pika 5 e nenit 125 të kushtetutës dhe shkronja “c” e pikës 1 të nenit 7/a të ligjit nr. 8577/2000, rezulton se ai është një kriter që nuk është ndalues në referim të mënyrës së votimit të këtij kriteri katër vota pro lejimit dhe katër vota kundër lejimit, çka në interpretim të dispozitave ligjore përbën shkak për cenimin e procesit të rregullt ligjor pasi vendimmarrja, arsyetimi i*

vendimit rezulton ndryshe nga mendimet e dhëna me shkrim, nga mënyra e votimit të anëtarëve të KED duke pasqyruar në fakt dy shkaqe për ndalimin e kandidimit kur në fakt votimi rezulton me gjashtë vota kundër vetëm për një kriter ndalues, të kandidatit Shaqir Hasanaj, për vendin vakant gjyqtar në Gjykatën Kushtetuese”, dhe në përfundim ka vendosur: “Pranimin pjesërisht të padisë.

-Shfuqizimin e vendimit nr.15, datë 17.07.2020 të nxjerrë nga i padituri Këshilli i Emërimeve në Drejtësi.

-Shfuqizimin e vendimit nr.16, datë 17.07.2020 të nxjerrë nga i padituri Këshilli i Emërimeve në Drejtësi.

-Pushimin e gjyqimit të çështjes për kërkimet e tjera të padisë.

-Ky vendim është përfundimtar dhe i formës së prerë.

-Shpenzimet gjyqësore i ngarkohen palës së paditur”

31. Në përfundim të veprimeve dhe procedurave të kontrollit dhe verifikimit, në zbatim të neneve 235, 236 dhe 237 të ligjit nr. 115/2016, si edhe të pikës 95 dhe 96 të Vendimit nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, si dhe në konsideratë të vendimit nr. 67 datë 10.08.2020 të Gjykatës Administrative të Apelit, anëtarja e Këshillit relatore e çështjes ka proceduar me përgatitjen e relacionit përkatës mbi gjendjen e faktit dhe të ligjit të zbatueshëm dhe e ka dërguar çështjen për shqyrtim në mbledhjen e Këshillit.

32. Në zbatim të pikës 33 të Vendimit të Këshillit të Emërimeve në Drejtësi nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, zv/Kryetarja ka thirrur mbledhjen e Këshillit duke njoftuar anëtarët për zhvillimin e saj në datën 21.8.2020, ora 13, rendin e ditës, si edhe duke i bashkëlidhur njoftimit materialet e çështjes. Në rendin e ditës është përfshirë çështja me objekt :

1.Shqyrtimi i gjetjeve në procedurën e verifikimit për kandidatin për vendin vakant, vakancë e parakohshme në Gjykatën Kushtetuese e rishpallur nga Kuvendi i Shqipërisë në datën 21.08.2019 dhe Presidenti i Republikës në datën 27.09.2019, Z. Shaqir Hasanaj.

2.Vendimarrja lidhur me lejimin/ndalimin e kandidimit te kandidatit te mësipërm.

33. Në zbatim të pikës 34 të Vendimit të Këshillit të Emërimeve në Drejtësi nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, dita dhe koha e zhvillimit të mbledhjes, së bashku me relacionin e përgatitur nga relatori, i është njoftuar kandidatit Shaqir Hasanaj, nëpërmjet postës elektronike zyrtare, në datën 19.08.2020.

34. I njëjti njoftim, së bashku me dokumentacionin e përgatitur nga relatori mbi veprimet e kryera gjatë procedurës së verifikimit, si edhe materiale të çështjes, i janë dërguar edhe Avokatit të Popullit.

35. Për zhvillimin e mbledhjes së Këshillit në datën 21.08.2020, ora 13, rendin e ditës dhe relacionin e përgatitur janë njoftuar edhe subjektet që sipas ligjit ftohen të marrin pjesë në mbledhjet e Këshillit.

36. Dita dhe koha e zhvillimit të mbledhjes, si edhe rendi i ditës janë njoftuar publikisht edhe në faqen zyrtare të Gjykatës së Lartë, në pjesën e caktuar për Këshillin e Emërimeve në Drejtësi.

37. Dokumentet e paraqitura Këshillit të Emërimeve në Drejtësi nga kandidati Shaqir Hasanaj në datën 20.08.2020 , një ditë para mbledhjes si :“1. Rendi i ditës së mbledhjes plenare të Këshillit të Lartë të Drejtësisë datë 18.11.2016 (në vijim rendi i ditës); 2. Raport mbi rezultatet e shqyrtimit të kandidatëve për transferim/emërim në 5 (pesë) vende vakante në Gjykatën e Rrethit Gjyqësor Tiranë, të Komisionit të Shqyrtimit të Kandidaturave për Gjyqtar, (në vijim Raporti); 3. Procesverbal i mbledhjes për shqyrtimin e kandidatëve për transferimin në 1 vend vakant pranë Gjykatës së Rrethit Gjyqësor Tiranë (në vijim Proces Verbal), iu komunikuan të gjithë anëtarëve dhe të ftuarve para fillimit të mbledhjes.

38. Në mbledhjen e Këshillit, pas relatimit të parashtruar nga anëtari relator dhe shpjegimeve mbi pyetjet sqaruese të drejtuara nga anëtarët e Këshillit, Këshilli dëgjoi mendimin e përfaqësuesit të Avokatit të Popullit lidhur me mënyrën e procedimit të ndjekur për verifikimin e kandidatit Shaqir Hasanaj.

II. Vlerësimi i Këshillit të Emërimeve në Drejtësi

39. Për sa i përket procedurës së verifikimit të pasurisë, në përfundim të veprimeve të kontrollit të ushtruar në zbatim të nenit 235 të ligjit nr. 115/2016, të ligjit nr. 9049/2003 dhe ligjit nr. 9367/2005, ILDKPKI-ja, me shkresën nr. 113/26 prot., datë 03.12.2019, ka dërguar pranë Këshillit të Emërimeve në Drejtësi rezultatet e kontrollit të ushtruar për kandidatin Shaqir Hasanaj dhe personat e lidhur me të.

40. Në përfundim të analizës së hollësishme financiare të kryer mbi bazën e gjetjeve të siguruara nga informacionet e dërguara nga institucione publike dhe subjekte private, lidhur me deklarinë e pasurisë dhe interesave private të kandidatit Shaqir Hasanaj, ILDKPKI-ja në raportin e paraqitur ka ardhur në përfundimet se:

- a) Deklarimi është i saktë në përputhje me ligjin.
- b) Ka burime financiare të ligjshme për të justifikuar pasurinë.
- c) Nuk ka kryer fshehje të pasurisë.
- ç) Nuk ka kryer deklarim të rremë.
- d) Nuk gjendet në situatën e konfliktit të interesave.

41. Këshilli i Emërimeve në Drejtësi verifikoi përputhshmërinë e të dhënave të deklaruara nga kandidati Shaqir Hasanaj në *Deklaratën e Pasurisë dhe Interesave Privatë të Kandidatit për Pozicione të Ndryshme në Institucionet e Sistemit të Drejtësisë* që ka depozituar pranë ILDKPKI-së, mbi bazën e të cilave ky institucion ka realizuar analizën financiare dhe ka ardhur në përfundimet e tij, në raport me të dhënat që rezultojnë nga informacionet e dërguara pranë Këshillit nga institucionet publike dhe private të treguara në pikën 16 të këtij Vendimi. Këshilli vlerësoi se, edhe pse Alpha Bank nuk i ka kthyer përgjigje Këshillit, rezulton se kjo bankë i ka kthyer përgjigje ILDKPKI-së dhe nuk rezulton që për këtë kandidat të ketë të dhëna financiare që ndikojnë në konkluzionet e ILDKPKI-së.

42. Mbi bazën e verifikimeve të kryera, Këshilli i rezulton se nuk ka gjetje që tregojnë të dhëna të padeklaruara apo mospërputhje të tyre me të dhënat e treguara në deklarinë e bëra nga kandidati Shaqir Hasanaj pranë ILDKPKI-së me *Deklaratën e Pasurisë dhe Interesave Privatë të Kandidatit për Pozicione të Ndryshme në Institucionet e Sistemit të Drejtësisë*.

43. Gjithashtu, Këshilli e vlerësoi të plotë dhe ezaurues, sipas kërkesave të legjislacionit në fuqi, hetimin e thelluar dhe analizat e hollësishme financiare të realizuara nga ILDKPKI-ja.

sikurse edhe përfundimet e këtij institucioni mbi kontrollin e pasurisë dhe interesave private të kandidatit Shaqir Hasanaj.

44. Për këto arsye, në zbatim të shkronjës “dh” të pikës 1 të nenit 7/a të ligjit nr. 8577/2000, si dhe të nenit 235 të ligjit nr. 115/2016, Këshilli vjen në përfundimin se kandidati Shaqir Hasanaj ka “*kaluar me sukses procesin e kontrollit dhe verifikimit të pasurisë së tij personale dhe të familjarëve të tij*”. Për rrjedhojë, në zbatim të nenit 235 të ligjit nr. 115/2016, **ky kandidat nuk gjendet në kushtet e ndalimit të kandidimit për sa i përket verifikimit të pasurisë.**

45. Lidhur me verifikimin dhe kontrollin e integritetit, kandidati Shaqir Hasanaj ka dorëzuar në afat formularin e vetëdeklarimit, sipas ligjit nr. 138/2015, të cilin, Këshilli ia ka përcjellë për verifikim dhe kompetencë sipas ligjit, Prokurorisë së Përgjithshme.

46. Prokuroria e Përgjithshme, me shkresën nr. 2690/114 prot., datë 21.11.2019, ka dërguar pranë Këshillit të Emërimeve në Drejtësi rezultatet e kontrollit të ushtruar për kandidatin Shaqir Hasanaj, duke ardhur në përfundimet se:

a) Subjekti deklarues Shaqir Hasanaj, nuk përfshihet në fushën e veprimit të nenit 2 të ligjit nr.138/2015 “*Për garantimin e integritetit të personave që zgjidhen, emërohen ose ushtrojnë funksione publike*”.

47. Prandaj, nisur nga rezultatet e kontrollit të ushtruar nga Prokuroria e Përgjithshme sipas ligjit, Këshilli vjen në përfundimin se kandidati Shaqir Hasanaj, krahas plotësimit të saktë të formularit të vetëdeklarimit, përmbush kushtin e parashikuar nga shkronja “ç” e nenit 7/a të ligjit nr. 8577/2000, pra që kandidati “*të mos jetë në procedim penal dhe të mos jetë dënuar me burgim për kryerjen e një vepre penale*”. Për rrjedhojë, **lidhur me këtë kriter, në zbatim të nenit 236 të ligjit nr. 115/2016, ky kandidat nuk gjendet në kushtet që mund të sjellin ndalimin e kandidimit.**

48. Në vijim të procedurave të verifikimit të integritetit, kandidati Shaqir Hasanaj ka dorëzuar në afat formularin e aplikimit “*Për informim përpara emërimit/zgjedhjes në poste të larta*”, parashikuar në ligjin nr. 45/2015, të cilin, Këshilli ia ka përcjellë për verifikim dhe kompetencë sipas ligjit Autoritetit për Informimin mbi Dokumentet e Ish-Sigurimit të Shtetit.

49. Autoriteti për Informimin mbi Dokumentet e Ish-Sigurimit të Shtetit, me shkresën nr.1386/4 prot., datë 25.10.2019, ka dërguar pranë Këshillit të Emërimeve në Drejtësi vendimin nr. 671, datë 25.10.2019, me rezultatet e kontrollit të ushtruar për kandidatin Shaqir Hasanaj, duke ardhur në përfundimet se:

Për zotin Shaqir Hasanaj, nga verifikimet e kryera deri tani, nuk figurojnë të ketë materiale në dokumentet të ish-Sigurimit të Shtetit në emër të tij, sipas nenit 29, pika 2 të Ligjit nr. 45/2015 “Për të Drejtën e Informimit për Dokumentet e ish-Sigurimit të Shtetit të Republikës Popullore Socialiste të Shqipërisë”.

50. Prandaj, nisur nga rezultatet e kontrollit të ushtruar nga Autoriteti për Informimin mbi Dokumentet e Ish-Sigurimit të Shtetit, Këshilli vjen në përfundimin se kandidati Shaqir Hasanaj, krahas plotësimit të saktë të formularit përkatës të aplikimit, përmbush kushtet e parashikuara nga ligji nr. 45/2015 për pastërtinë e figurës së funksionarit të lartë të drejtësisë në lidhje me sjelljen dhe veprimtarinë tij përpara muajit korrik 1991. Për rrjedhojë, **lidhur me**

këtë kriter, në zbatim të nenit 236 të ligjit nr. 115/2016, **ky kandidat nuk gjendet në kushtet që mund të sjellin ndalimin e kandidimit**.

51. Gjithashtu, Këshilli i Emërimeve në Drejtësi verifikoi, nëpërmjet informacionit të sjellë sipas ligjit nga organet kompetente ligjzbatuese si Drejtoria e Sigurimit të Informacionit të Klasifikuar dhe Shërbimi për Çështjet e Brendshme dhe Ankesat pranë Ministrisë së Brendshme, nëse kandidati Shaqir Hasanaj “*ka lidhje ose kontakte të papërshtatshme me personat e përfshirë në krimin e organizuar ose me persona të dyshuar të krimit të organizuar*”. Ky verifikim përbën standardin kushtetues dhe ligjor tashmë të vendosur, për figurën dhe integritetin e funksionarëve kushtetues të sistemit të drejtësisë, përpara zgjedhjes dhe gjatë ushtrimit të funksionit, pas ndryshimeve të Kushtetutës në vitin 2016, duke pasur parasysh ato të përcaktuara edhe në nenin DH të Aneksit të Kushtetutës, si edhe në ligjet e tjera të nxjerra në pajtim me të, përfshirë edhe ligjin nr. 84/2016 “Për rivlerësimin kalimtar të gjyqtarëve dhe prokurorëve në Republikën e Shqipërisë”, pra mbi të njëjtat standarde dhe interpretim të këtij kriteri në procesin e rivlerësimit kalimtar të gjyqtarëve dhe prokurorëve.

52. Shërbimi për Çështjet e Brendshme dhe Ankesat pranë Ministrisë së Brendshme me shkresën nr. 2155 prot., datë 22.10.2019 dhe nr. 2050/2 prot., datë 28.10.2019, ka përcjellë pranë Këshillit të Emërimeve në Drejtësi informacionin e kërkuar, të cituar në pikën më sipër, nga ku rezulton se, në lidhje me kandidatin Shaqir Hasanaj:

Nuk figuron i evidentuar për veprimtari kriminale.

53. Drejtoria e Sigurimit të Informacionit të Klasifikuar, me shkresën nr.3777 prot., datë 21.11.2019, ka përcjellë pranë Këshillit të Emërimeve në Drejtësi informacionin e klasifikuar e të përpunuar sipas standardeve ligjore dhe profesionale për këtë kategori informacionesh, të dërguara nga agjencitë ligjzbatuese të cituara në pikën më sipër, nga ku rezulton se, në lidhje me kandidatin Shaqir Hasanaj:

Në përfundim të procedurave të verifikimit, nuk disponohen të dhëna/informacione që bien në kundërshtim me kërkesat e pikës 89 gërmat “a” dhe “c” për integritetin e figurës së z. Shaqir Hasanaj.

54. Këshilli i Emërimeve në Drejtësi, bazuar në njohjen dhe shqyrtimin e informacionit të klasifikuar të dërguar nga agjencitë ligjzbatuese, vjen në përfundimin se, **edhe për këtë kriter**, në zbatim të nenit 236 të ligjit nr. 115/2016, **kandidati Shaqir Hasanaj nuk gjendet në kushtet që mund të sjellin ndalimin e kandidimit**.

55. Për verifikimin e kushteve dhe kriteve të tjera ligjore të kandidimit, në zbatim të shkronjave “b”, “c” dhe “d” të pikës 1, pikës 2 dhe 3 të nenit 7/a të ligjit nr. 8577/2000, të neneve 237 dhe 240 të ligjit nr. 115/2016, si edhe në zbatim të pikave 91-93 të Vendimit të Këshillit të Emërimeve në Drejtësi nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, Këshilli shqyrtoi dokumentacionin e depozituar nga vetë kandidati Shaqir Hasanaj në momentin e kandidimit pranë organit të emërtesës që ka shpallur vendin vakant, shpjegimet dhe dokumentet shtesë të paraqitura nga kandidati mbi kërkesën e Këshillit, si edhe përgjigjet nga informacionet e kërkuara nga institucionet publike dhe subjektet private ku kandidati ka ushtruar funksione publike ose veprimtari private profesionale apo ku gjenden të dhëna lidhur me ushtrimin e detyrave dhe veprimtarinë profesionale të tij.

56. Në lidhje me kushtin e kandidimit të parashikuar nga pika 4 e nenit 125 të Kushtetutës dhe shkronja “b” e pikës 1 të nenit 7/a të ligjit nr. 8577/2000, pra që kandidati të ketë *mbaruar arsimin e lartë juridik, Diplomë e Nivelit të Dytë*, nga dokumentacioni i shqyrtuar rezulton se kandidati Shaqir Hasanaj ka përfunduar studimet e larta në Universitetin e Tiranës në Fakultetin e Drejtësisë në periudhën 1991 - 1995, duke u diplomuar si “Jurist”. Në zbatim të ligjit nr. 80/2015 “Për Arsimin e Lartë dhe Kërkimin Shkencor në Institucionet e Arsimit të Lartë në Republikën e Shqipërisë”, ky lloj arsimimi kualifikohet si arsim i lartë juridik, Diplomë e Nivelit të Dytë. Për rrjedhojë **kandidati Shaqir Hasanaj nuk gjendet në kushtet e ndalimit të kandidimit sipas dispozitave të sipërcituara.**

57. Lidhur me kushtin e kandidimit të parashikuar nga pika 4 e nenit 125 të Kushtetutës dhe shkronja “a” e pikës 2 të nenit 7/a të ligjit nr. 8577/2000, pra që kandidatët të kenë *të paktën 15 vjet përvojë pune si gjyqtarë, prokurorë, avokatë, profesorë ose lektorë të së drejtës, nëpunës të nivelit të lartë në administratën publike*, nga dokumentacioni i shqyrtuar, përfshirë jetëshkrimin, librezën e punës, shkresa e vërtetime të lëshuara nga organet kompetente të emërtesës etj., që janë të administruara në dosjen e kandidimit, ndërmjet të tjerave, rezulton se kandidati Shaqir Hasanaj ka ushtruar veprimtari profesionale si:

- a) Jurist i Përgjithshëm pranë Radio Televizionit Shqiptar në periudhën 01.03.1993 – 10.02.1996;
- b) Asistent pedagog në Universitetin e Tiranës, Fakulteti i Drejtësisë, në lëndën “E drejta e detyrimeve”, për periudhën 1995 – 1997;
- c) Gjyqtar pranë Gjykatës së Rrethit Gjyqësor Tiranë për periudhën 08.02.1996 – 25.05.1999;
- d) Avokat në periudhën 2001 – 2012;
- e) Këshilltar juridik pranë Presidentit të Republikës në periudhën 26.07.2012 – 25.07.2017;
- f) Avokat për periudhën 2018 e në vijim.

58. Bazuar në gjetjet e cituara si më sipër, Këshilli konstaton se kandidati Shaqir Hasanaj **ka ushtruar së paku për 15 vjet veprimtari profesionale dhe nuk gjendet në kushtet e ndalimit të kandidimit sipas dispozitave të sipërcituara.**

59. Lidhur me kushtin e kandidimit të parashikuar nga pika 5 e nenit 125 të Kushtetutës dhe shkronja “c” e pikës 1 të nenit 7/a të ligjit nr. 8577/2000, pra që kandidati të mos ketë *mbajtur pozicione drejtuese në parti politike gjatë 10 viteve të fundit nga data e kandidimit*, nga shqyrtimi i jetëshkrimit dhe të dhënave që rezultojnë nga aktet e administruara në dosjen e kandidimit, sikurse janë korrespondenca me partitë politike, Këshilli konstaton se kandidati Shaqir Hasanaj nuk ka mbajtur pozicione drejtuese në parti politike (gjatë 10 viteve të fundit nga data e kandidimit). Për rrjedhojë **kandidati Shaqir Hasanaj nuk gjendet në kushtet e ndalimit të kandidimit sipas dispozitave të sipërcituara.**

60. Për sa i përket kushtit të kandidimit të parashikuar nga pika 5 e nenit 125 të Kushtetutës dhe shkronja “c” e pikës 1 të nenit 7/a të ligjit nr. 8577/2000, pra që kandidati të mos ketë *ushtruar funksione politike në administratën publike gjatë 10 viteve të fundit nga data e kandidimit*, sikurse është parashtruar më lart, si edhe nga jetëshkrimi dhe aktet e administruara në dosjen e kandidimit për veprimtaritë e tjera të ushtruara, Këshilli konstaton se kandidati Shaqir Hasanaj ka ushtruar funksionin si Këshilltar juridik pranë Presidentit të Republikës për periudhën 26.07.2012 - 25.07.2017.

61. Në lidhje me kriterin e parashikuar në shkronjën “d” të pikës 1 të nenin 7/a të ligjit nr. 8577/2000, që kandidati “*të mos jetë larguar nga detyra për shkaqe disiplinore dhe të mos ketë masë disiplinore në fuqi*”, rezulton e provuar nga shkresa nr. 5180/1 prot., datë 25.10.2019 e Këshillit të Lartë Gjyqësor se:

- Z. Shaqir Hasanaj me Vendimin nr. 28/1, datë 20.03.1999 të Këshillit të Lartë të Drejtësisë i është dhënë masa disiplinore “*Vërejtje me paralajmërim*”.
- Z. Shaqir Hasanaj me Vendimin nr. 37, datë 25.05.1999 të Këshillit të Lartë të Drejtësisë i është dhënë masa disiplinore e “*Shkarkimit nga detyra e gjyqtarit*” për mosparaqitje në provimin e kualifikimit profesional.

62. Për verifikimin e kushtit të parashikuar nga shkronja “c” e pikës 1 të nenit 7/a të ligjit nr. 8577/2000, që kandidati “*të mos ketë ushtruar funksione politike në administratën publike dhe të mos ketë mbajtur pozicione drejtuese në parti politike gjatë 10 viteve të fundit nga data e kandidimit*”, Këshilli i Emërimeve në Drejtësi i është drejtuar institucioneve publike dhe subjekteve private, pranë të cilave kandidati Shaqir Hasanaj ka ushtruar funksione publike apo private. Me shkresën nr. 3795/1 prot., datë 05.11.2019, të Sekretarit të Përgjithshëm të Institucionit të Presidentit të Republikës ka ardhur përgjigja se:

- “*...Zoti Shaqir Hasani ka qenë punonjës i Institucionit të Presidentit të Republikës, ku ka ushtruar detyrën e Këshilltarit Juridik të Presidentit të Republikës, prej datës 26.07.2012 deri në datën 25.07.2017.*”
- *Siç rezulton nga aktet e emërimit, zoti Hasanaj është emëruar në detyrën e Këshilltarit Juridik bazuar në nenin 30, të ligjit nr. 8549, datë 11.11.1999 “Për statusin e nëpunësit civil” dhe nenit 8 e 14 të ligjit nr. 8095, datë 21.03.1996 “Për shërbimin civil në Republikën e Shqipërisë”.*
- *Referuar bazës ligjore të sipërcituar, si dhe organikave bashkëlidhur, zoti Hasanaj ka qenë pjesë e stafit politik pranë Institucionit të Presidentit të Republikës...”.*

63. Në përgjigje të shpjegimeve të kërkuara nga Këshilli, lidhur me periudhën që kandidati ka punuar si Këshilltar juridik pranë Presidentit të Republikës, si dhe në lidhje me masat disiplinore në ngarkim të tij, në shkresën nr. 51 prot., datë 17.02.2020, kandidati Shaqir Hasanaj, ka parashtruar se:

- *Funksioni i këshilltarit juridik pranë Presidentit të Republikës nuk mund të konsiderohet si funksion politik, sipas nenit 125 pika 5 të Kushtetutës dhe nenit 7/a të ligjit nr. 8577/2000 të ndryshuar, pasi Presidenti i Republikës nuk ushtron funksione politike apo partiake, por ushtron detyrat kushtetuese dhe ligjore si kryetari i shtetit dhe se i ndalohet të kryejë funksione dhe veprimtari politike;*
- *Ligji nr. 152/2013 nuk e njeh terminologjinë e funksionarit politik dhe se sipas këtij ligji administrata e Presidentit të Republikës konsiderohet si pjesë e administratës së një institucioni të pavarur, duke shfuqizuar sakaq ligjin nr. 8300/1998 që ndryshoi ligjin nr. 8095/1996;*
- *Ligji nr. 90/2012 parashikon se status politik kanë vetëm administrata e kabinetit të ministrave apo të Këshillit të Ministrave;*
- *Nëse do të interpretohej ndryshe do të përjashtoheshin nga kandidimi në Gjykatën Kushtetuese një kategori i gjerë e profesionistëve, duke i pamundësuar ecurinë e karrierës përgjatë 10 viteve;*
- *Funksionarët e kabinetit të Presidentit të Republikës, Kryetarit të Gjykatës Kushtetuese, Avokatit të Popullit, Prokurorit të Përgjithshëm, Guvernatorit të Bankës së Shqipërisë, Kryetarit të Kontrollit të Lartë të Shtetit etj. nuk mundet të konsiderohen si funksionarë politikë, pasi asnjë nga detyrat e tyre nuk ka karakter*

- politik dhe se këto funksione nuk mund të barazohen me deputetët, ministrat, Kryeministrin, zëvendësministrat apo drejtorët dhe funksionarët e tyre të kabinetit, duke pasur parasysh edhe opinionin e ndërmjetëm të Komisionit të Venecias;
- Këshilli i Emërimeve në Drejtësi duhet të zbatojë drejtpërdrejtë Kushtetutën, pasi ajo i imponohet dhe prevalon mbi ligjin;
 - Me Vendimin nr. 100, datë 30.07.2019 Këshilli i Emërimeve në Drejtësi ka konkluduar se pozicioni i këshilltarit juridik pranë Presidentit të Republikës nuk është pozicion politik dhe se për rrjedhojë nuk mundet që të ndryshohet qasja dhe vendimmarrja e mbajtur nga një organ kushtetues;
 - Masa disiplinore “Vërejtje me paralajmërim” nuk mundet të jetë e përjetshme dhe se me kalimin e dy viteve kjo masë nuk duhet të ekzistonte më në dosje pasi është parashkruar;
 - Vendimi nr. 37, datë 25.05.1999 i Këshillit të Lartë të Drejtësisë për shkarkimin nga detyra për mosparaqitje në provim është nul dhe antikushtetues, pasi Gjykata Kushtetuese me Vendimin nr. 59, datë 05.11.1999 ka shfuqizuar si antikushtetues paragrafin e tretë të nenit 48 të Ligjit nr. 8436, datë 28.12.1998;
 - Gjithashtu me Vendimin nr. 3, datë 20.02.2006 të Gjykatës Kushtetuese është vendosur shfuqizimi i pikës 6 të nenit 42 të Ligjit nr. 8436/1998, duke konkluduar se shkaqet e shkarkimit janë të parashikuara në mënyrë shteruese në nenin 147/6 të Kushtetutës dhe se ligji nuk mund të parashikojë të tjera;
 - Mosparaqitja në provim ka ardhur si pasojë e pamundësisë fizike dhe shëndetësore për shkak të sëmundjes, fakti i cili provohet nëpërmjet raportit mjekësor, provë e cila nuk është pranuar të merret parasysh;
 - Isha në pamundësi të mbrohesh nga personat që kanë ushtruar tortura, kanë dënuar mua dhe prindërit dhe kanë shkatërruar familjet më të mira në Shqipëri;
 - Unë luftova në atë kohë për të ruajtur drejtësinë e pa kapur nga pushteti që të mos të degjeneronte deri këtu sa sot të vjen turp të thuash jam gjyqtar;
 - Kualifikimi im do t’i shërbente grupit të të përndjekurve politik, pasi kjo ngjarje do të shënonte rikthimin në këtë gjykatë pas 76 vjetësh të të parit individ nga ky grupim shoqëror;
 - Nga largimi kolektiv i 65 gjyqtarëve një pjesë e tyre janë kthyer dhe vazhdojnë të ushtrojnë detyrën e gjyqtarit dhe se nuk mund të mbahen dy standarde mbi këtë çështje;
 - Këshilli i Emërimeve në Drejtësi duhet të vendosë lejimin e kandidimit tim.

64. Në verifikim të kushtit të kandidimit të parashikuar nga pika 5 e nenit 125 të Kushtetutës dhe shkronja “c” e pikës I të nenit 7/a të Ligjit nr. 8577/2000, pra që kandidati të mos ketë ushtruar funksione politike në administratën publike gjatë 10 viteve të fundit nga data e kandidimit, Këshilli në votimin për këtë gjetje u nda katër vota pro konstatimit se kandidati Shaqir Hasanaj ka ushtruar funksione politike në administratën publike (gjatë 10 viteve të fundit të kandidimit) dhe katër vota kundër këtij konstatimi. Për rrjedhojë sipas parashikimit të pikës 44 të Vendimit të Këshillit të Emërimeve në Drejtësi nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, që në mënyrë të qartë parashikon se: “44. Vendimet e Këshillit në lidhje me procedurën e verifikimit të kandidatëve merren me shumicën e votave të anëtarëve të Këshillit që marrin pjesë në mbledhje. Abstenimi nuk lejohet. Në rast të barazisë së votave, kandidimi konsiderohet i lejuar”, arrihet në përfundimin se kandidati **nuk gjendet në kushtet e ndalimit të kandidimit për sa i përket këtij kushti.**

65. Në lidhje me kushtin e parashikuar në shkronjën “d” të pikës I të nenit 7/a të ligjit nr. 8577/2000, që kandidati “të mos jetë larguar nga detyra për shkaqe disiplinore dhe të mos

ketë masë disiplinore në fuqi”, rezulton e provuar nga shkresa nr. 5180/1 prot., datë 25.10.2019 e Këshillit të Lartë Gjyqësor se:

- Z. Shaqir Hasanaj me Vendimin nr. 28/1, datë 20.03.1999 të Këshillit të Lartë të Drejtësisë i është dhënë masa disiplinore “Vërejtje me paralajmërim”.
- Z. Shaqir Hasanaj me Vendimin nr. 37, datë 25.05.1999 të Këshillit të Lartë të Drejtësisë i është dhënë masa disiplinore e “Shkarkimit nga detyra e gjyqtarit” për mosparaqitje në provimin e kualifikimit profesional.

66. Këshilli i Emërimeve në Drejtësi me shkresën nr. 715 prot., datë 08.11.2019 ka kërkuar informacion të mëtejshëm pranë Këshillit të Lartë Gjyqësor lidhur me gjyqtarët e shkarkuar për mospjesëmarrje në provimin e organizuar sipas ligjit nr. 8436, datë 28.12.1998 “Për organizimin e pushtetit gjyqësor në Republikën e Shqipërisë” (në vijim ligji nr. 8436/1998), vendimet dhe dokumentacionin përkatës dhe se sa prej gjyqtarëve të shkarkuar janë rikthyer në detyrë, mënyrën se si janë rikthyer dhe dokumentacionin përkatës. Këshilli i Lartë Gjyqësor ka përcjellë me shkresën nr. 5591/1 prot., datë 13.11.2019 informacionin dhe dokumentacionin e kërkuar. Nga këto të dhëna nuk rezulton që kandidati Shaqir Hasanaj të jetë rikthyer në detyrën e gjyqtarit dhe nuk rezulton që vendimi i shkarkimit nga detyra të ketë qenë objekt revokimi nga organi administrativ apo objekt shfuqizimi nga Kolegjet e Bashkuara të Gjykatës së Lartë (shih nenin 147 të Kushtetutës së pandryshuar në vitin 2016).

67. Gjithashtu, pas verifikimit të kushteve në konsideratë të vendimit nr. 67 datë 10.08.2020 të Gjykatës Administrative të Apelit, si dhe pas njoftimit të relacionit, më datë 20.08.2020, kandidati Shaqir Hasanaj, ka paraqitur përpara Këshillit aktet shkresore të përcjella nga Këshilli i Lartë Gjyqësor me shkresën nr.3776/2 datë 11/08.2020:

1. Rendi i ditës së mbledhjes plenare të Këshillit të Lartë të Drejtësisë datë 18.11.2016;
2. Raport mbi rezultatet e shqyrtimit të kandidatëve për transferim/emërim në 5 (pesë) vende vakante në Gjykatën e Rrethit Gjyqësor Tiranë, të Komisionit të Shqyrtimit të Kandidaturave për Gjyqtar;
3. Procesverbal i mbledhjes për shqyrtimin e kandidatëve për transferimin në 1 vend vakant pranë Gjykatës së Rrethit Gjyqësor Tiranë, të cilat, sikurse të gjitha aktet e tjera shkresore, iu nënshtruan shqyrtimit të Këshillit.

68. Këshilli i Emërimeve në Drejtësi sjell në vëmendje se në kohën kur Këshilli i Lartë i Drejtësisë ka marrë vendimin e masave disiplinore të sipër cituara, vepronte ligji nr. 8436/1998, i cili në nenin 42 parashikonte se ndaj shkeljeve disiplinore mund të merren masat disiplinore si më poshtë: vërejtje; vërejtje me paralajmërim; ulje në pagë deri në masën 25 për qind për një periudhë nga 3-6 muaj; pezullim nga detyra dhe kalim në një detyrë tjetër më të ulët brenda gjykatës për një periudhë nga gjashtë muaj deri në një vit; transferim në një gjykatë tjetër; shkarkim nga detyra. Në këtë ligj nuk parashikoheshin afate për parashkrimin dhe shuarjen e masave disiplinore.

69. Ligji i mëpasshëm, nr. 9877, datë 18.02.2008 “Për organizimin e pushtetit gjyqësor në Republikën e Shqipërisë”, i cili ka shfuqizuar ligjin nr. 8436/1998, në nenin 33 kategorizonte shkeljet disiplinore të gjyqtarëve në tre lloje, konkretisht shkelje të lehta, shkelje të rënda dhe shkelje shumë të rënda. Pika 3 e kësaj dispozite parashikonte se për shkeljet shumë të rënda disiplinore jepej masa e shkarkimit nga detyra të gjyqtarit. Pika 6 e kësaj dispozite parashikonte edhe afatet e parashkrimit të masave disiplinore që jepeshin për shkeljet e rënda dhe të lehta të disiplinës nga ana e gjyqtarëve. Kjo pjesë e dispozitës parashikonte se për efekt të procedimit disiplinor, masat disiplinore të rënda shlyhen brenda 3 vjetëve nga data e dhënies së tyre, në qoftë se nuk është marrë ndonjë masë tjetër disiplinore, ndërsa masat

disiplinore të lehta shlyhen brenda 2 vjetëve nga data e dhënies së tyre, në qoftë se nuk është marrë ndonjë masë tjetër disiplinore. Këshilli i Emërimeve në Drejtësi, sa më lart, evidenton se masa disiplinore për shkeljet shumë të rënda në detyrë të gjyqtarëve as nuk shlyheshin dhe as nuk parashkruheshin.

70. Lidhur me masën disiplinore “*Vërejtje me paralajmërim*”, marrë me Vendimin nr. 28/1, datë 20.03.1999 të Këshillit të Lartë të Drejtësisë, siç është parashtruar më lart, Këshilli i Emërimeve në Drejtësi, duke iu referuar ligjit nr. 96/2016 që është aktualisht në fuqi, konstaton se masa disiplinore “*vërejtje me paralajmërim*” nuk parashikohet nga legjislacioni si masë disiplinore, por tashmë parashikohen masat disiplinore “*vërejtje konfidenciale*” dhe “*vërejtje publike*”. Në rastin e parë ligji nuk parashikon shënimin në regjistër dhe në rastin e dytë ligji parashikon se masa disiplinore shuhet dhe fshihet nga regjistri pas kalimit të afatit dy vjet nga data e hyrjes në fuqi të masës disiplinore. Për rrjedhojë, bazuar në parimin e ligjshmërisë, konkludohet që masa disiplinore “*vërejtje me paralajmërim*”, e marrë nga KLD-ja në datën 20.03.1999 ndaj kandidatit, z. Shaqir Hasanaj, është shuar.

71. Në terma të tjera, për efekt të zbatimit të drejtë të shkronjës “d” të pikës 1 të nenit 7/a të ligjit nr. 8577/2000, nuk mundet të mjaftojë për vendimmarrjen e ndalimit të kandidimit vetëm ekzistenca e një mase disiplinore e ndryshme nga shkarkimi, por duhet që kjo masë disiplinore të jetë në fuqi, që do të thotë që të mos jetë shfuqizuar nga organi epor administrativ, të mos jetë shfuqizuar apo të mos jetë konstatuar apo shpallur e pavlefshme nga gjykata apo edhe të mos jetë shuar sipas afateve ligjore. Në rastin konkret masa disiplinore “*Vërejtje me paralajmërim*” e marrë në cilësinë e gjyqtarit për z. Shaqir Hasanaj është dhënë në vitin 1999. Duke qenë se nga momenti i dhënies së masës e deri në momentin e kandidimit kanë kaluar 20 vjet, Këshilli i Emërimeve në Drejtësi konkludon se masa disiplinore “*vërejtje me paralajmërim*” *ex lege* është shuar dhe, për rrjedhojë, nuk është në fuqi. Kjo do të thotë se kjo masë disiplinore nuk mund të shërbejë si pengesë për kandidimin e z. Shaqir Hasanaj.

72. Këshilli i Emërimeve në Drejtësi konstaton se z. Shaqir Hasanaj është larguar nga detyra e gjyqtarit me masën disiplinore të “*Shkarkimit nga detyra të gjyqtarit*”, nga Këshilli i Lartë i Drejtësisë me Vendimin nr. 37, datë 25.05.1999, i cili është i formës së prerë dhe përfundimtar. Shkak për këtë vendimmarrje është bërë fakti se z. Shaqir Hasanaj nuk ka marrë pjesë në provimin e kualifikimit profesional, që është zhvilluar në atë kohë, sipas nenit 48 të ligjit nr. 8436/1998.

73. Gjetjet e sipërcituara janë bërë objekt shqyrtimi dhe vlerësimi edhe në vendimin nr. 16, datë 17.07.2020 të Këshillit të Emërimeve në Drejtësi, i cili u shfuqizua me vendimin nr. 67 datë 10.08.2020 të Gjykatës Administrative të Apelit. Në këto kushte dhe në respektim të kërkesave dhe konstatimeve të Gjykatës Administrative të Apelit, ky Këshill realizoi edhe njëherë procedurën e verifikimit të kushteve të kandidatit z. Shaqir Hasanaj, të cilin e njoftoi në datë 19.08.2020 duke i dërguar relacionin përfundimtar dhe gjetjet përkatëse.

74. Pas marrjes së relacionit, më datë 20.08.2020, kandidati Shaqir Hasanaj, ka paraqitur përpara Këshillit, kundërshtimet e tij dhe ka bashkëlidhur disa akte shkresore të marra nga Këshilli i Lartë Gjyqësor, me të cilat pretendon se masa disiplinore e shkarkimit nga detyra e gjyqtarit është revokuar nga ana e Këshillit të Lartë të Drejtësisë, prandaj ai duhet të lejohet të vijojë kandidimin.

75. Siç është thënë në paragrafin e mësipërm, për të kundërshtuar gjetjen dhe se nuk ka masë disiplinore në fuqi, z. Shaqir Hasanaj paraqiti përpara Këshillit aktet shkresore, të cilat mbajnë vulën e Këshillit të Lartë Gjyqësor:

"1. Rendi i ditës së mbledhjes plenare të Këshillit të Lartë të Drejtësisë datë 18.11.2016 (në vijim rendi i ditës);

2. Raport mbi rezultatet e shqyrtimit të kandidatëve për transferim/emërim në 5 (pesë) vende vakante në Gjykatën e Rrethit Gjyqësor Tiranë, të Komisionit të Shqyrtimit të Kandidaturave për Gjyqtar, (në vijim Raporti);

3. Procesverbal i mbledhjes për shqyrtimin e kandidatëve për transferimin në 1 vend vakant pranë Gjykatës së Rrethit Gjyqësor Tiranë (në vijim Proces Verbal)".

76. Këshilli evidenton, se në dokumentet shkresore të cituara më sipër, pasqyrohet fakti se më datë 18.11.2016 Këshilli i Lartë i Drejtësisë në mbledhjen e datës 18.11.2016 ka pasur në rend dite edhe shqyrtimin e kandidaturave për gjyqtarë në Gjykatën e Rrethit Gjyqësor Tiranë, ku sipas aktit "Raport" vërtetohet se një prej kandidaturave ka qenë edhe z. Shaqir Hasanaj. Në lexim literal të paragrafit 'b' dhe pikës 2, thuhet se "*komisioni vlerësoi se kandidatët të cilët plotësojnë kriteret për t'u transferuar/emëruar, por vijnë nga jashtë sistemit, janë: 2. Shaqir Hasani, ish gjyqtar në Gjykatën e Rrethit Gjyqësor Tiranë. Komisioni vlerëson se ky kandidat i plotëson kriteret për emërimin në këtë gjykatë*". Ndërsa në provën dokument "Proces Verbal", literalisht lexohet në pikën 47 se: "*Shaqir Hasani, aktualisht këshilltar ligjor i Presidentit të Republikës, ish gjyqtar në Gjykatën e Rrethit Gjyqësor Tiranë në periudhën 1996-1999. Ka përfunduar studimet në Universitetin e Tiranës, Fakulteti i Drejtësisë në vitet 1991-1995, me notë mesatare 9.5; me shkëputje nga puna. Vjetërsia në gjyqësor 3 vjet. Nuk ka vlerësim profesional dhe etik të gjyqtarit sepse vjen nga jashtë sistemit. Nuk rezulton që ndaj tij të jetë dhënë ndonjë masë disiplinore. Komisioni vlerëson se ky kandidat i plotëson kriteret për emërim në këtë gjykatë*". Fakti i cituar në aktin shkresor "Proces Verbal", se "*Nuk rezulton që ndaj tij të jetë dhënë ndonjë masë disiplinore*", kundërshtohet tërësisht nga prova dokument Vendimi nr. 37, datë 25.05.1999 të Këshillit të Lartë të Drejtësisë, në pikën 8 të të cilit qartësisht lexohet se, Shaqir Hasani për mosparaqitje në provimin e kualifikimit profesional, pa arsye, të shkarkohet nga detyra e gjyqtarit të Gjykatës së Rrethit Tiranë. Siç do të argumentohet në paragrafët në vijim, vendimi nr. 37, datë 25.05.1999 i Këshillit të Lartë të Drejtësisë nuk është kundërshtuar nga kandidati Shaqir Hasanaj dhe nuk është shfuqizuar nga autoriteti gjyqësor kompetent.

77. Përveç konstatimit të faktit se, aktet e paraqitura nga kandidati, z. Shaqir Hasanaj, nuk pasqyrojnë gjendjen e faktit lidhur me masën disiplinore të "Shkarkimit nga detyra" vendosur nga Këshilli i Lartë i Drejtësisë me Vendimin nr. 37, datë 25.05.1999, Këshilli i Emërimeve në Drejtësi vlerëson se, sidoqoftë konkludimi në Raportin e Komisionit të Shqyrtimit të Kandidaturave për Gjyqtar, në Këshillin e Lartë të Drejtësisë, nuk është referues dhe për më tepër aspak detyrues për Këshillin e Emërimeve në Drejtësi, pasi bëhet fjalë për një Komision që kompetencat i ka pasur dhe ezauruar brenda atyre të dhëna me vendimin nr. 274/2, datë 16.02.2011 "Për organizimin dhe funksionimin e Komisionit të Shqyrtimit të kandidaturave për Gjyqtarë", i ndryshuar.

78. Nga ana tjetër, pretendimi i kandidatit Shaqir Hasanaj se këto akte provojnë që masa disiplinore e shkarkimit të dhënë me vendimin nr. 37, datë 25.05.1999 të Këshillit të Lartë të Drejtësisë, është revokuar dhe nuk është më në fuqi, nuk qëndron dhe vjen në kundërshtim me gjendjen faktike rezultuar nga provat e paraqitura nga ana e Këshillit të Lartë Gjyqësor

dhe nga vetë kandidati, siç është argumentuar më sipër, si dhe, me ligjin specifik qoftë në kohën kur është marrë vendimi i shkarkimit ashtu edhe me ligjin aktualisht në fuqi.

79. Këshilli vlerëson se, sipas nenit 48 në kombinim me nenin 46 të ligjit nr. 8436/1998 (ligji veprues në kohën kur Këshilli i Lartë i Drejtësisë ka marrë vendimin nr. 37, datë 25.05.1999), gjyqtari kur shkarkohej nga detyra për një nga arsyet e parashikuara në Kushtetutë, kishte të drejtë të ankohej në Gjykatën e Lartë brenda 10 ditëve nga njoftimi i vendimit të Këshillit të Lartë të Drejtësisë. Më tej, kjo normë (neni 46 i ligjit nr. 8436/1998) parashikonte se gjykimi i çështjes bëhej nga Kolegjet e Bashkuara të Gjykatës së Lartë, duke përcaktuar kështu edhe organin kompetent të kontrollit të vendimit nr. 37, datë 25.05.1999 të Këshillit të Lartë të Drejtësisë.

80. Siç është thënë edhe më sipër, nga aktet e administruara nuk rezulton që kandidati Shaqir Hasanaj ta këtë kundërshtuar vendimin nr. 37, datë 25.05.1999 të Këshillit të Lartë të Drejtësisë, që ka marrë masën disiplinore të “Shkarkimit nga detyra”, sipas ligjit. Për pasojë, në kushtet kur nr. 37, datë 25.05.1999 të Këshillit të Lartë të Drejtësisë, për sa ka vendosur në lidhje me z. Shaqir Hasanaj, nuk është shfuqizuar nga Kolegjet e Bashkuara të Gjykatës së Lartë, si i vetmi organ kompetent për shqyrtimin e ligjshmërisë së këtyre vendimeve të Këshillit të Lartë të Drejtësisë, Këshilli vlerëson se kjo masë disiplinore është në fuqi.

81. Këshilli i Emërimeve në Drejtësi, ndryshe nga sa pretendon në parashtrësën e tij kandidati Shaqir Hasanaj, vlerëson se vendimi i Gjykatës Kushtetuese për shfuqizimin e paragrafit të tretë të nenit 45 të ligjit nr. 8436/1998, nuk mundet të përbëjë rrethanë ligjore që të passjellë shfuqizimin automatik dhe *ex lege* të masës disiplinore të “shkarkimit nga detyra” e marrë nga ana e Këshillit të Lartë të Drejtësisë për secilin gjyqtar, cilido qoftë shkaku i marrjes së masës disiplinore, qoftë ky edhe për shkakun e moskalimit të provimit apo për shkakun e mosparaqitjes në provimin profesional të zhvilluar. Meqenëse masa disiplinore e shkarkimit nga detyra është një masë individuale, po ashtu është edhe shfuqizimi i saj.

82. Gjithashtu, referuar si ligjit të kohës, ligjit pasues, ashtu edhe ligjit të sotëm, i cili në mënyrë eksplicite parashikon se masa **disiplinore e shkarkimit nga detyra nuk shuhet dhe nuk fshihet nga regjistri**, (pika 3 e nenit 150 të ligjit nr. 96/2016) Këshilli i Emërimeve në Drejtësi konkludon se masa disiplinore e shkarkimit nga detyra e gjyqtarit, marrë me Vendimin nr. 37, datë 25.05.1999 të Këshillit të Lartë të Drejtësisë, për z. Shaqir Hasanaj, është në fuqi.

83. Për sa më sipër, Këshilli i Emërimeve në Drejtësi, nga provat e administruara konstaton se z. Shaqir Hasanaj është larguar nga detyra e gjyqtarit me Vendimin nr. 37, datë 25.05.1999, të Këshillit të Lartë të Drejtësisë për shkaqe disiplinore dhe, ndaj tij ka masë disiplinore në fuqi, për rrjedhojë ai **nuk plotëson kushtet ligjore të parashikuara nga shkronja “d” e pikës 1 të nenit 7/a të ligjit nr. 8577/2000. Për rrjedhojë sipas nenit 237 pika 3, të ligjit nr. 115/2016, z. Shaqir Hasanaj gjendet në kushtet e ndalimit të kandidimit.**

84. Nisur nga sa analizohet dhe arsyetohet më sipër, bazuar në gjetjet dhe të dhënat e konstatuara gjatë procedurës së verifikimit që rezultojnë nga aktet dhe dokumentacioni që përmban dosja e kandidimit, në interpretim dhe zbatim të ligjit të zbatueshëm për kushtet dhe kriteret e kandidimit për gjyqtar në Gjykatën Kushtetuese, Këshilli i Emërimeve në Drejtësi, me shumicë votash, vjen në përfundimin se duhet të vendoset ndalimi i kandidimit të kandidatit z. Shaqir Hasanaj, në vendin vakant për gjyqtar në Gjykatën Kushtetuese të shpallur nga Presidenti i Republikës më datë 07.02.2018 dhe rishpallur më datë 27.09.2019.

PËR KËTO ARSYE:

Në mbështetje të pikës 1 të nenit 149/d të Kushtetutës, të nenit 7/a të ligjit nr. 8577/2000 “Për organizimin dhe funksionimin e Gjykatës Kushtetuese të Republikës së Shqipërisë”, i ndryshuar, të pikës 3 të nenit 229, të pikës 3 të nenit 237 të ligjit nr. 115/2016 “Për organet e qeverisjes së sistemit të drejtësisë”, si edhe të shkronjës “a” të pikës 50 të Vendimit të Këshillit të Emërimeve në Drejtësi nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, i ndryshuar, Këshilli i Emërimeve në Drejtësi, me shumicë votash,

VENDOSI:

1. Ndalimin e kandidimit të kandidatit Shaqir Hasanaj, në vendin vakant për gjyqtar në Gjykatën Kushtetuese, të shpallur nga Presidenti i Republikës më datë 07.02.2018 dhe rishpallur më datë 27.09.2019.
2. Në zbatim të nenit 238 të ligjit nr. 115/2016, ky vendim i njoftohet kandidatit Shaqir Hasanaj.
3. Kandidati Shaqir Hasanaj ka të drejtën e ankimit në Gjykatën Administrative të Apelit, jo më vonë se 5 ditë nga dita e njoftimit të vendimit të arsyetuar.
4. Ky vendim publikohet në faqen zyrtare të Gjykatës së Lartë, në pjesën e përcaktuar për Këshillin e Emërimeve në Drejtësi.



MENDIM PAKICE

Në ndryshim me qëndrimin e mbajtur nga shumica e Këshillit të Emërimeve në Drejtësi në vendimin nr. 23, datë 21.08.2020 për ndalimin e kandidimit të kandidatit Shaqir Hasanaj, për vendin vakant të gjyqtarit të Gjykatës Kushtetuese, vakancë e parakohshme e rishpallur nga Presidenti i Republikës në datën 27.09.2019, në vijim paraqes argumentet e mia për qëndrimin në pakicë.

Në lidhje me kriterin e parashikuar në shkronjën “d” të pikës 1 të nenin 7/a të ligjit nr. 8577/2000, që kandidati “*të mos jetë larguar nga detyra për shkaqe disiplinore dhe të mos ketë masë disiplinore në fuqi*”, Këshilli ka konstatuar se kandidati Shaqir Hasanaj është larguar nga detyra e gjyqtarit për shkaqe disiplinore dhe ndaj tij ka masë disiplinore në fuqi, për rrjedhojë ai nuk plotëson kushtin për lejimin e kandidimit të parashikuar nga shkronja “d” e pikës 1 të nenit 7/a të ligjit nr. 8577/2000.

Nga aktet e administruara nga Këshilli, rezulton se me vendimin nr. 37, datë 25.05.1999 të Këshillit të Lartë të Drejtësisë për kandidatin është dhënë masa disiplinore e “*Shkarkimit nga detyra e gjyqtarit*” për mosparaqitje në provimin e kualifikimit profesional. Këshilli i Lartë Gjyqësor, me shkresën nr. 5591/1 prot., datë 13.11.2019, i ka kthyer përgjigje Këshillit të Emërimeve në Drejtësi në lidhje me informacionin e kërkuar për gjyqtarët e shkarkuar për mospjesëmarrje në provimin e organizuar sipas ligjit nr. 8436, datë 28.12.1998 “Për organizimin e pushtetit gjyqësor në Republikën e Shqipërisë” (*në vijim ligji nr. 8436/1998*), vendimet dhe dokumentacionin përkatës dhe se sa prej gjyqtarëve të shkarkuar janë rikthyer në detyrë, mënyrën se si janë rikthyer dhe dokumentacionin përkatës, informacionin dhe dokumentacionin e kërkuar dhe të paraqitur nga kandidati.

Sipas shumicës, nuk rezulton që kandidati ta këtë kundërshtuar masën disiplinore të “Shkarkimit nga detyra”, sipas ligjit, për rrjedhojë, në kushtet kur ajo nuk është shfuqizuar nga Kolegjet e Bashkuara të Gjykatës së Lartë, si organi kompetent për shqyrtimin e ligjshmërisë së këtyre vendimeve të Këshillit të Lartë të Drejtësisë, ajo është akoma në fuqi. Sipas shumicës, ndryshe nga sa pretendon kandidati Shaqir Hasanaj, vendimi i Gjykatës Kushtetuese për shfuqizimin e paragrafit të tretë të nenit 45 të ligjit nr. 8436/1998, nuk mundet të përbëjë rrethanë ligjore që të passjellë shfuqizimin automatik dhe *ex lege* të masave disiplinore të marra nga ana e Këshillit të Lartë të Drejtësisë për secilin gjyqtar, cilido qoftë shkaku i marrjes së masës disiplinore, qoftë ky edhe për shkakun e moskalimit të provimit apo për shkakun e mosparaqitjes në provimin profesional të zhvilluar. Meqenëse masa disiplinore është një masë individuale, po ashtu është edhe shfuqizimi i saj. Po ashtu, sipas shumicës, referuar si ligjit të kohës, ligjit pasues ashtu edhe ligjit të sotëm, i cili në mënyrë eksplicite parashikon se masa disiplinore e shkarkimit nga detyra nuk shuhet dhe nuk fshihet nga regjistri, masa disiplinore e shkarkimit nga detyra e gjyqtarit, marrë me Vendimin nr. 37, datë 25.05.1999 të Këshillit të Lartë të Drejtësisë, përkundrajt z. Shaqir Hasanaj është në fuqi, çka shkakton krijimin e një pengese ligjore për të vijuar kandidimin e tij për gjyqtar në Gjykatën Kushtetuese.

Në vlerësimin tim, edhe pse është fakt që masa disiplinore për kandidatin Shaqir Hasanaj nuk rezulton të jetë revokuar nga KLD-ja, nuk është kundërshtuar prej tij, dhe për rrjedhojë nuk është shfuqizuar nga Kolegjet e Bashkuara të Gjykata e Lartë, si organi kompetent, Këshilli i Emërimeve në Drejtësi, duhej t'i kishte dhënë rëndësinë e duhur jo vetëm kohës së gjatë të kaluar nga dhënia e kësaj mase dhe shkaqeve për të cilat është dhënë ajo, por çka është më e rëndësishme, faktit që me vendimin Gjykatës Kushtetuese nr. 59, datë 05.11.1999 është

shfuqizuar paragrafi i tretë i nenit 48 të ligjit nr. 8436/1998, i cili parashikonte shkarkimin e gjyqtarëve që nuk kalonin me sukses provimin e kualifikimit profesional.

Rezulton se vendimi i Këshillit të Lartë të Drejtësisë (KLD) për masën e dhënë për kandidatin Shaqir Hasanaj është marrë përpara vendimit të Gjykatës Kushtetuese, për rrjedhojë, pas shfuqizimit të normës nga Gjykata Kushtetuese, në përputhje me parimin e fuqisë detyruese të vendimeve të kësaj Gjykate dhe efektit të tyre, KLD-ja duhej të kishte vlerësuar individualisht masat e dhëna, për sa kohë që baza ligjore për marrjen e këtyre vendimeve nuk ishte më në fuqi.

Për më tepër, në vendimin e saj nr. 3, datë 20.02.2006, Gjykata Kushtetuese, gjatë kontrollit të pajtueshmërisë me Kushtetutën të pikës 6, të nenit 42, të ligjit nr. 8436/1998, është shprehur se, shkarkimi nga detyra i gjyqtarit, e drejta e ankimit ndaj këtij vendimi si dhe organi që duhet ta marrë atë në shqyrtim rregullohen drejtpërdrejt nga Kushtetuta. Kjo përbën një garanci më shumë për gjyqtarët për shkak të funksionit që ata kryejnë dhe misionin që u ka ngarkuar shteti dhe shoqëria.

Bazuar në sa më sipër, për sa kohë që shkak i shkarkimit për kandidatin Shaqir Hasanaj nuk parashikohej shprehimisht në Kushtetutë, si dhe për shkak të rrethanave të veçanta të kësaj çështje, pra në situatën që norma ligjore bazë për dhënien e masës së shkarkimit ishte shfuqizuar si e papajtueshme me Kushtetutën, vlerësoj se edhe Këshilli i Emërimeve në Drejtësi duhej të bënte një interpretim më të zgjeruar dhe në pajtim me dispozitat kushtetuese dhe ligjore për rastin e kandidatit Shaqir Hasanaj.

Për sa më sipër, vlerësoj se duhet të lejohet kandidimi i z. Shaqir Hasanaj.

ZËVENDËSKRYETARË

Vitore TUSHA